



PROJEKAT  
**PODRŠKA  
GRAĐANIMA  
U BORBI  
PROTIV  
KORUPCIJE**  
NEWSLETTER ZA I KVARTAL 2022.



**USAID**  
OD AMERIČKOG NARODA



CENTRI CIVILNIH INICIJATIVA  
CENTRI GRAĐANSKOG AKTIVIZAMA



TRANSPARENCY  
INTERNATIONAL  
BOSNA I HERCEGOVINA



CENTAR ZA REFORME IZOBILJE I INICIJATIVE







# Opis projekta

Projekat „Podrška građanima u borbi protiv korupcije (ACFC)“ provode Centri civilnih inicijativa (CCI), kao glavni implementator, te Transparency International BiH (TIBiH) i Centar za razvoj medija i analize (CRMA) kao partneri na projektu, a podržan je od strane Američke agencije za međunarodni razvoj (USAID). Projekat se implementira u periodu septembar 2019 – septembar 2024. godine.

Cilj projekta ACFC je povećati učešće građana u borbi protiv korupcije, te su sve projektne aktivnosti dizajnirane i osmišljene na način da potiču snažan i održiv antikorupcijski aktivizam u cijeloj zemlji i na svim nivoima. Projekat ACFC ima za svrhu da civilno društvo bude reprezentativno i kredibilno u borbi protiv korupcije.

U okviru projekta realizuju se sljedeće aktivnosti:

- Monitoring i zagovaranje antikorupcijskih legislativa u sljedećim oblastima: sukob interesa, zaštita zviždača, javne nabavke i zloupotreba javnih sredstava u izbornim kampanjama;
- Uključivanje građana i izgradnja kulture koja odbacuje korupciju
- Koordinacija i izgradnja kapaciteta uključenih organizacija



## Korupcija nije problem pojedinca!!!

Grupa ste građana koja se suočava sa korupcijom u vašoj zajednici i zbog toga ne možete da ostvarite pravo koje pripada vama ili širem krugu ljudi?

Trpите posljedice loših odluka donesenih usljed zloupotrebe položaja ovlaštenih lica ili nezakonitog postupanja vlasti?

Kontaktirajte nas u cilju dobijanja podrške vašim inicijativama u borbi protiv korupcije

**063 396 536**

[protivkorupcije@ccibh.org](mailto:protivkorupcije@ccibh.org)



# Antikoruptivni aktivizam širom Bosne i Hercegovine



Kontaktirajte ih putem njihovih FB stranica!

Više na portalu [antikorupcija.info](http://antikorupcija.info)

- 
- Banja Luka**
    - UG "Restart Srpska
    - Unija udruženja poslodavaca Republike Srpske"
    - Udruženje „Misli dobro“
    - UG "Put pravde"
    - Centar za edukaciju "Pro Educa"
    - NGG "Protiv kamenoloma Planina u naselju Karanovac"
  - Bijeljina**
    - Helsinški odbor za ljudska prava
    - NGG "Zaustavimo nelegalnu eksploataciju šljunka u Bijeljini"
  - Brčko**
    - NGG "Za transparentno finansiranje neprofitnih organizacija iz budžeta Brčko distrikta"
    - NGG "Za priznate diplome od akreditovanih visokoskolskih ustanova u Brčko distriktu BiH"
    - Omladinski centar Vermont
    - UG „Demos“
  - Doboj**
    - NGG "Za legalnu eksploataciju minerala iz korita rijeke Bosne"
    - NGG "Licencirane i akreditovane visokoškolske ustanove - validne i priznate diplome"
    - NGG „Uklonite Heksan iz Kotorskog“,
    - Centar za humanu politiku
    - UG "Tolerancijom protiv različitosti (ToPeeR)"
  - Drvar**
    - NGG "Drvar bez nelegalnog otpada"
  - Foča**
    - NGG "Sačuvajmo rijeke Foče"
  - Goražde**
    - NGG "Spasimo Drinu"
  - Istočno Sarajevo**
    - NGG "Stop izgradnji mHE na Kasindolskoj rijeci"
    - "Ženski interaktivni ruralni centar" (ŽIR)
  - Jablanica**
    - NGG "Za Doljanku"
  - Konjic**
    - NGG "Neretvica - Pusti me da tečem"
  - Kozarska Dubica**
    - NGG "Reaguj protiv nepravilnosti koji ugrozavaju zdravlje i životnu sredinu"
  - Kreševo**
    - NGG "Kreševski građanski pokret"
  - Livno**
    - UG "Centar za građansku saradnju" CGS Livno
  - Maglaj**
    - NGG „Za legalnu eksploataciju minerala u gornjem toku rijeke Bosne“,
  - Mostar**
    - NGG "Jer nas se tiče"
    - NGG "Stop izgradnji mHE Buna I i II"
    - NGG „Stop nelegalnoj gradnji na Bijelom Brijegu“
    - Udruženje profesionalaca, trenera i službenika za javne nabavke u BiH (UPTIS)
    - NGG „Ne na Buni i u mome Blagaju“
    - NGG „Građanska inicijativa Kuti“
  - Petrovo**
    - NGG „Čuvari Ozrena“
  - Prijedor**
    - Udruženje za zaštitu potrošača DON Prijedor
  - Sarajevo**
    - NGG "Hastahana park"
    - NGG "Nelegalna gradnja u opštini Stari Grad"
    - NGG "Inicijativa KCUS"
    - Udruženje „Ja BiH u EU“
    - Udruženje poslodavaca u Federaciji BiH
    - BIRN BiH
    - Udruženje "Baby Steps"
    - Udruženje Sindikat uposlenika Fonda
    - NGG „Spas u zadnji čas – Spasimo Dobrinju“
    - Centar za razvoj omladinskog aktivizma (CROA)
    - Inicijativa za šumarstvo i okoliš
    - Aarhus centar
  - Šipovo**
    - NGG "Farmeri"
  - Trebinje**
    - UG "Stop mobbing"
  - Tešanj**
    - NGG "Netransparentno trošenje sredstava iz budžeta za vodosnabdjevanje građana"
  - Trnovo**
    - NGG "Stop nelegalnom odlaganju otpada na Krupačkim stijenama"
  - Tuzla**
    - Građanski pokret "Buđenje"
    - NGG "Inicijativa protiv odlagališta šljake i pepela iz Termoelektrane u MZ Šićki Brod"
  - Višegrad:**
    - NGG "Ođbranimo rijeke Višegrada"
    - NGG „Uklonimo nelegalnu deponiju pred turističkim gradom“
  - Vitez**
    - NGG "Hrabre žene Kruščice"
    - NGG "Naše zgrade - naše pravo da znamo"
  - Zenica**
    - NGG "Čuvari zraka"
    - NGG "Pokret za preokret"
  - Zvornik**
    - NGG „STOP nelegalnim šljunkarama na rijeci Drini“
  - Žepče**
    - NGG „Spriječimo nelegalnu eksploataciju šljunka na području Žepča i Zavidovića“





## Građanski aktivisti, širom BiH, obilježili Svjetski dan voda



Građanski aktivisti širom Bosne i Hercegovine godinama dižu glas kako bi zaštitili vodu, jedan od osnovnih elemenata života i opstanka živog svijeta. Zahvaljujući svojoj upornosti i hrabrosti u svojoj borbi ostvaruju pobjede, pomjeraju granice, poništavaju nelegalne dozvole i uprkos svim preprekama nastavljaju svoju bitku protiv nezakonitosti i neregularnosti u bosanskohercegovačkom društvu.

Simbolično, povodom Međunarodnog dana voda, nekoliko neformalnih grupa i udruženja građana su, širom Bosne i Hercegovine, u 7 dana posvećenih ovom važnom datumu, organizovali različite aktivnosti, te, uz glavnu temu, podsjetili javnost protiv kojih nepravilnosti i neregularnosti se oni bore i koja su nova dešavanja u okviru njihove borbe. Iz Bosne i Hercegovine je još jednom poslana jedinstvena poruka građanima da se pridruže borbi za očuvanje voda, a protiv nezakonitosti koje ih ugrožavaju.



*„Voda je jedan od naših najznačajnijih resursa. U Sarajevu je pitka voda ugrožena divljom gradnjom na Bjelašnici i Igmanu, potencijalnom izgradnjom skladišta kerozina na Dobrinji i generalno neočuvanjem vodovodnog sistema. Mi se zalažemo za to da zaštitimo našu vodozaštitnu zonu, da sačuvamo pitku vodu grada Sarajevo i da možemo da nastavimo da je koristimo sa česme.“*

NGG Spas u zadnji čas – Spasimo Dobrinju, Sarajevo

*“Kamenolom “Planina” nalazi se u neposrednoj blizini izvorišta pitke vode rijeke Vrbasa, te je njegovim radom svakako ugroženo ovo izvorište, ali i čitav Vrbas. Oblaci prašine šire se više kilometara okolo eksploatacionog područja. Naš aktivizam je usmjeren ne samo ka zaštiti našeg mirnog života, već i ka čuvanju bisera poput naše rijeke Vrbas.”*



NGG Sačuvajmo Karanovac, Banja Luka



*„Boreći se za spas rijeke Neretvice, stanovnici doline Neretvice su svjesni toga da se uporedo s tim bore i protiv korupcije koja se čini na projektu gradnje mini hidrocentrala.“*

UG Neretvica – Pusti me da tečem, Konjic

*„Mi smo Međunarodni dan voda obilježili čišćenjem Kasindolske rijeke i rijeke Željeznice. Želimo poručiti da ćemo odbraniti Kasindolsku rijeku od izgradnje mHE i očuvati je i očistiti od smeća. Svim građanima želimo da poručimo da o našim vodama i rijekama treba da se brinemo svakog dana tokom godine, a ne samo na Međunarodni dan voda.“*



NGG Stop izgradnji mHE na Kasindolskoj rijeci, Istočno Sarajevo



*„Mostovi nisu građevine od zemlje, kamena, blata, željeza. Mostovi su građevine koji imaju svoju svrhu. Ovaj zid nema svoju svrhu, a ova rijeka ima svoju dušu i imaće je uvijek.“*

NGG Spasimo Drinu, Goražde

*„Uspješne priče dolaze iz onih mjesta gdje se građani uistinu uhvate u sistemsku borbu protiv korupcije. Konkretno u mHE postoje interesne grupe koje igraju po dobro uigranim pravilima i znaju sve buduće korake.“*



UG Za Doljanku, Jablanica



*“Pozivam sve građane da se uključe u borbu u zaštitu naših rijeka, jer to je javni interes, a ne interes pojedinca i želim da nam pomognu u borbu protiv koruptivnog čerupanja naših rijeka.”*

NGG Odbranimo rijeke Višegrada, Višegrad





“Nalazimo se u naselju Kotorско nekih 16 kilometara udaljena je od Doboja i nekih 30ak od Modriče. Ovo bi bilo dosta ljepše i bilo bi puno i ribe i labudova i drugih životinja i priroda bila bi zaista ljepša da smo znali očuvati naše rijeke našu rijeku Bosnu.”

NGG Za legalnu eksploataciju minerala iz korita rijeke Bosne, Dboj

“Rijeka Bosna je ljepotica i nosi ime naše države i zato apelujemo na sve da je poštuju kao što bi trebali poštovati svoju domovinu.”

NGG Za legalnu eksploataciju minerala u gornjem toku rijeke Bosne, Maglaj



**HRABRI GRAĐANI BOSNE I HERCEGOVINE USPJEŠNO VODE ANTIKORUPCIJSKU BORBU U SVOJIM LOKALNIM ZAJEDNICAMA**





# POKRENUTA ISTRAGA PROTIV AKTERA URBICIDA NA BIJELOM BRIJEGU U MOSTARU



Početakom 2019. godine započela je borba mještana Bijelog Brijega u Mostaru protiv nelegalne gradnje, točnije gradnjom stambeno poslovnog objekta. Građani su se organizirali, jer su uočili niz kršenja procedura i zakona s posebnim osvrtom na činjenicu da regulacionim planom nije dozvoljena gradnja novih zgrada već samo proširenje postojećih i to u određenim gabaritima.

U međuvremenu pravnim putem su spriječili izgradnju nove zgrade, a u šestom mjesecu 2021. postigli su rušenje šestog kata koji nije ucrtan u projektu. Gradske vlasti na različite načine kupuju vrijeme da se ilegalni objekat legalizira, kako bi time skinuli sa sebe vlastitu odgovornost. Da je to tako potvrđuje i činjenica da Grad Mostar odlaže obnovu postupka.

U cijeli slučaj uključen je i Federalni MUP i Tužiteljstvo HNŽ-a. FUP je završio istražne radnje i dostavio svoj nalaz Tužiteljstvu HNŽ/K koje je pokrenulo istragu i pozvalo predstavnika Građanske inicijative STOP nelegalnoj gradnji na Bijelom Brijegu da dođe na saslušanje u svojstvu svjedoka. Sva ova događanja upućuju na opravdanost sumnje građanske inicijative u regularnost ishodovanih dozvola za gradnju ovog stambenog objekta.







## Građani ne odustaju! Tužilaštvo SBK pokrenulo istragu povodom nelegalnog rada kamenoloma i Tvornica vapna u Kreševu!

Mještani naselja Bjelovići iz Kreševa godinama vode borbu protiv rada kamenoloma i Tvornice vapna koji ugrožavaju zdravlje ljudi i životnu sredinu. Firma BFS d.o.o nema potrebne dozvole za rad, a ignoriše i zabrane izdate od strane nadležnih inspeksijskih organa. Rudarsko – geološka inspekcija Ministarstva privrede SBK još 2019. godine je zabranila privrednom društvu BFS d.o.o. da vrši obavljanje rudarskih poslova na lokalitetima Rastovica i Krčevine do pribavljanja odobrenja za istraživanje i eksploataciju te ostalih odobrenja propisanih Zakonom o rudarstvu, ali je prilikom kontrole pronašla tragove rudarenja. Zbog sumnje da je počinjeno krivično djelo skidanja ili povrede službenog pečata, a nakon što je prijavu podnio Federalni urbanističko-ekološki inspektor, pokrenuta je istraga u Tužilaštvu Srednjobosanskog kantona.

I federalni vodni inspektor je, nakon što je BFS d.o.o. nekoliko puta prekršila njegovo rješenje kojim se „zabranjuje upotreba objekta i pogona koji se koriste u svrhu prerade mineralnih sirovina, krečnjaka i dolomita”, uputio Tužilaštvu SBK informaciju o inspeksijskom nadzoru iz aprila prošle godine.

Građani su proteklih mjeseci nekoliko puta izražavali svoje nezadovoljstvo činjenicom da Tvornica vapna i dalje nelegalno radi, pa su tako početkom februara izašli na protest, a nakon toga su organizovali press konferenciju na kojoj su pozvali nadležno Federalno ministarstvo okoliša i turizma da ne obnovi okolinsku dozvolu za rad tvornice koja je istekla krajem februara zbog kršenja niza zakona i nepoštivanja inspeksijskih zabrana. Nakon toga su predali su peticiju sa 500 potpisa građana koji traže da se obustavi izdavanje nove okolinske dozvole. Na javnoj raspravi vezanoj za izdavanje okolinske dozvole održanoj krajem februara mještani naseljena u blizini Tvornice vapna su jednoglasno rekli da ne žele ovakvu tvornicu koja predstavlja prijetnju za zdravlje i zbog koje ne mogu normalno živjeti te su ukazali još jednom na sve zakonske nepravilnosti i propuste.





## Građanska inicijativa Kuti zatražila preispitivanje koncesionog ugovora za rad kamenoloma

Građanska inicijativa Kuti ulaže značajne napore kako bi spriječila nelegalnu eksploataciju i otvaranje kamenoloma u neposrednoj blizini naselja u kojem žive. Investitor je započeo izvoditi radove na osnovu urbanističke suglasnosti koja je istekla, a nema ni Odobrenja za eksploataciju i Odobrenje za izvođenje rudarskih radova što su po zakonu i glavnom rudarskom projektu obavezni posjedovati. Međutim, bez obzira na ove nepravilnosti i bez obzira na upozorenja i prijave mještana te inspeksijske nalaze koji ukazuju na pokušaj eksploatacije bez potrebnih dozvola, mjerodavne institucije same ne poduzimaju nikakve mjere odnosno ne preispituje koncesiju. Stoga su aktivisti zatražili preispitivanje koncesionog ugovora, a Vlada naložila Ministarstvu gospodarstva da o zahtjevu građana sačini pisanu informaciju. Pokrenute su dvije inicijative u GV Mostara kako bi se kamenolom Kuti izbrisao iz Prostornog plana.

Građani također smatraju kako je i okolinska dozvola izdata na nezakonit i netransparentan način, jer nisu sukladno zakonu sudjelovali u postupku te su protiv iste pokrenuli tužbu pred Kantonalnim sudom u Sarajevu.







# PALE I VODNE SAGLASNOSTI ZA GRADNJU MALIH HIDROELEKTRANA NA NERETVICI!

Mještani iz doline Neretvice okupljeni oko inicijative “Neretvica - Pusti me da tečem” ni tokom zimskih dana ne miruju. Pravna borba je u punom jeku. Tako se udruženje građana “Neretvica – Pusti me da tečem” u januaru obratilo Agenciji za vodno područje Jadranskog mora sa zahtjevom po pitanju nastupanja činjenice isteka važenja vodne saglasnosti za mHE “Sirijanski most” i mHE “Gorovnik-ušće” koje je ova Agencija izdala. Agencija je Udruženje obavijestila da su ispunjeni zakonom propisani uslovi za prestanak važenja vodnih saglasnosti za male hidroelektrane “Sirijanski most” i “Gorovnik-ušće” na rijeci Neretvici. Odredbama Zakona o vodama je definisano da vodna saglasnost prestaje da važi istekom roka od dvije godine od dana njenog izdavanja ukoliko do tog dana nije pribavljeno odobrenje za građenje i nisu započeti radovi.

Investitoru (Elektroprivreda BiH d.d.) je izdata vodna saglasnost na projektnu dokumentaciju za izgradnju mHE 16.07.2018. godine, a 2021. godine je ukinuto ranije izdato odobrenje za građenje, odnosno odbijen zahtjev za izdavanje istog, s obzirom na sve to te činjenicu da nikakvi radovi nisu započeti, ispunjeni su zakonom propisani uslovi za prestanak važenja vodne saglasnosti.

Povodom ovoga iz udruženja “Neretvica - Pusti me da tečem” su istakli: “Mi ovo doživljavamo kao još jednu pobjedu u nizu. Narod iz doline Neretvice već odavno živi u ubjeđenju da prilikom izdavanja dozvola za gradnju malih hidroelektrana nije bilo sve po zakonu. S obzirom na to da potpisnici koncesionog ugovora (EPBiH i Općina Konjic) ne žele da raskinu koncesioni ugovor mi smo odlučili da ćemo pravdu i naše uvjerenje dokazati i da ćemo istinu izvesti na čitac.”



„Njihovo je da probaju, naše je da ne damo i neće dobiti garantujemo“

Vejsil Hondo, Konjic.





## UG „ZA DOLJANKU“: BLIŽIMO SE MEĐUNARODNIM SUDOVIMA – PRESUDE KOJE SMO DOBILI SU OBESMIŠLJENE KAD ZAKON NIKO NE POŠTUJE

Prigodom ishodovanja mišljenja lokalne zajednice o izgradnji mHE Zlate prekršen je Zakon o principima lokalne samouprave F BiH. Uz to napravljen je i cijeli niz drugih kršenja zakona i procedura koje je utvrdio i Kantonalni sud u Sarajevu kada je donio Rješenje o poništenju okolinske dozvole i vraćanju postupka na početak. Naime, grupa je prije početka kampanje pokrenula dva sudska spora - protiv okolinske dozvole izdate od strane Federalnog ministarstva okoliša i turizma i protiv građevinske dozvole izdate od strane županijskog ministarstva građenja. Obje dozvole su poništene i postupak je vraćen na početak.

U međuvremenu napravljene su izmjene Zakona o zaštiti okoliša kojim je propisano da za mHE nije potrebno ishodovati okolinsku dozvolu. Ministrica ne želi primijeniti članak zakona koji nalaže da se postupci pokrenuti po starom zakonu, po njemu moraju i završiti. Njeno tumačenje je kako je postupak završen izmjenom zakona. Investitor se obratio sa novim zahtjevom za okolinsku dozvolu koji je odbijen zbog krivog tumačenja zakona.

Građani su nakon toga pokrenuli tužbu protiv ovog Rješenja i organizirali press konferenciju na kojoj su iskazali svoj protest po pitanju nepoštivanja sudskih presuda i najavila naredne korake koje će poduzeti.







## GRAĐANI DOBRINJE I SARAJEVA IZAŠLI NA ULICU! TRAŽE HITNU REAKCIJU NADLEŽNIH INSTITUCIJA POVODOM GRADNJE SPORNOG KOMPLEKSA

Neformalna grupa građana “Spas u zadnji čas – Spasimo Dobrinju” u proteklim mjesecima konstantno je ukazivala na propuste prilikom izdavanja dozvola za gradnju spornog kompleksa na Dobrinji koji se sastoji od rezervoara kerozina, benzinske pumpe sa pratećim objektima, samouslužne autopraonice i hotela, na udaljenosti manjoj od 50m od stambenih zgrada.

Građani su u februaru održali press konferenciju na kojoj su javnosti prezentovali niz neregularnosti koje su otkrili pri izdavanju saglasnosti i dozvola te apelovali na nadležne da je u pitanju III vodozaštitna zona u kojoj je ovakva vrsta gradnje strogo zabranjena. Pored toga su istakli da su zbog gradnje spornog kompleksa ugroženi životi građana sa sigurnosnog aspekta, zdravstvenog zbog isparavanja naftnih derivata te da je ugroženo snadbijevanje pitkom vodom u čitavom gradu Sarajevu. Osim toga, sporan je način kako su izdate okolinska, urbanistička i građevinska dozvola.

S obzirom na to da nadležne institucije još uvijek ne reaguju, građani su izašli na ulicu i organizovali protest na kojem su još jednom pozvali nadležne institucije na reakciju te su im poručili: “Mi očekujemo što bržu reakciju Kantonalnog Tužilaštva Kantona Sarajevo u vezi sa predatim krivičnim prijavama protiv svih odgovornih u ovom slučaju. Također, Ured za borbu protiv korupcije i upravljanje kvalitetom Kantona Sarajevo je uputio Kantonalnom tužilaštvu niz dokaza do kojih su došli u ovom slučaju. Zbog svega navedenog pozivamo sve odgovorne institucije na zajednički sastanak kako bismo pronašli najbolje rješenje u konkretnom slučaju.”







## **RESORNO KANTONALNO MINISTARSTVO PROSTORNOG UREĐENJA ZDK NIJE DALO SAGLASNOST NA TRI SPORNA NACRTA REGULACIONIH PLANOVA GRADA ZENICE**

Nakon što je Gradsko vijeće Zenice usvojilo Odluke o usvajanju nacрта tri Regulaciona (Nacrta Regulacionog plana „Kamberovića ravan i padina“, Nacrta Regulacionog plana „Crkvice“ i Nacrta Regulacionog plana „Trg Alije Izetbegovića“ plana) i provelo Javne raspave o ovim nacrtima, početkom oktobra 2021. godine aktivista neformalne grupe „Pokret za preokret“ Boris Britvar je uputio Kantonalnoj upravi za inspekcijske poslove Zeničko-dobojskog kantona Zahtjev o inspekcijskom nadzoru u smislu Zakona o prostornom uređenju i građenju ZDK i Uredbe o jedinstvenoj metodologiji za izradu dokumenata prostornog uređenja, a vezano za Odluke Gradskog vijeća Zenica donesene na 13. sjednici koja je održana 30.09.2021.godine.

U odgovoru na zahtjev „Pokreta“ je navedeno da je Zakonom o prostornom uređenju i građenju ZDK propisano da inspekcijski nadzor nad izradom, ostvarivanjem i provođenjem planskih dokumenata na razini Grada provodi gradski urbanistički inspektor, te su Zahtjev prosljedili Službi za inspekcijske poslove Grada Zenice. Takođe, u odgovoru se navodi da Kantonalna uprava za inspekcijske poslove nema popunjeno radno mjesto kantonalnog urbanističkog inspektora, tako da nisu u mogućnosti izvršiti inspekcijski nadzor, te su Zahtjev prosljedili Federalnoj upravi za inspekcijske poslove i resornom kantonalnom ministarstvu.

Nakon nekoliko mjeseci pravne borbe sa inspekcijskim organima na svim nivoima, „Pokret“ je konačno dobio prvu bitku i time dokazao da su sporna tri nacrti donesena nezakonito od strane Gradskog vijeća. Naime, da bi Nacrt Regulacionog plana došao na dnevni red sjednice Gradskog vijeća isti mora imati saglasnost od strane Kantonalnog Ministarstva za prostorno uređenje u smislu usklađenosti sa dokumentima višeg reda, tj. urbanističkim planom. Temeljem Zakona o prostornom uređenju i građenju ZDK resorno Ministarstvo je utvrdilo da regulacioni planovi nisu u skladu sa važećim planskim dokumentima šireg područja i nisu dali saglasnost na regulacione planove.

Međutim, Gradska uprava Zenice, na čelu sa gradonačelnikom Kasumovićem, za sada ne uvažava stav i odluku Ministarstva i nastavlja aktivnosti kako bi ozakonili regulacione planove i pogodovali građevinskom lobiju.



## Tužbom građanske inicijative „Jer nas se tiče“ blokirano otvaranje novih kazeta za odlaganje otpada

Nakon što je Federalno Ministarstvo okoliša i turizma izdalo okolinsku dozvolu na Plan prilagodbe deponije Uborak, Građanska inicijativa „Jer nas se tiče“ je utužila ovaj dokument što je blokiralo proces provođenja Plana prilagodbe kojim je predviđeno otvaranje novih kazeta za odlaganje otpada.

Grad Mostar je u pregovorima sa međunarodnim donatorima osigurao mogućnost kreditiranja, ali samo u slučaju povlačenja tužbe. Na jednoj od posljednjih sjednica Gradskog vijeća Mostara usvojen je Zaključak kojim se Grad Mostar obvezao na zatvaranje i sanaciju deponije Uborak u narednih pet godina. Međutim kako su građani izričiti u svom zahtjevu da se deponija trajno izmjesti na novu lokaciju, a ona se uopće ne spominje u navedenim dokumentima, ne žele povući tužbu.



**INTERES  
MOSTARA  
JE ZATVARANJE  
UBORKA!  
POKAŽITE NAM  
NOVU LOKACIJU**







## U Višegradu otvorena nova turistička destinacija – nelegalna gradska deponija!

Građani koji žive u mjestu Holijaci, Višegrad, već 28 godina vode borbu sa nelegalnom gradskom deponijom u blizini svojih kuća. Nebrigom i ignorisanjem nadležnih, deponija postoji i koristi se bez ikakve dozvole za rad, već skoro tri decenije, a dodatni problem stvaraju i pojedini mještani Višegrada, koji, pored komunalnog preduzeća, na istoj toj deponiji nelegalno odlažu otpad svih vrsta.

Deponija, koja je lokacijom ograničena, redovno se dopunjava komunalnim i svakim drugim otpadom, ali se prethodno otpad spaljuje, na istoj lokaciji, da bi se omogućio prostor za novo odlaganje. Spaljivanjem otpada se stvara nenasan smrad, kao i oblaci dima, što dodatno pogoršava nepodnošljivo stanje i neprijatne mirise, a građanima koji žive u neposrednoj blizini deponije ovakve činjenice ugrožavaju zdravlje, i to na dnevnom nivou.

Građani ujedinjeni u inicijativu „Uklonimo nelegalnu deponiju pred turističkim gradom Višegradom“ u martu su održali satiričan performans otvaranja nove „turističke destinacije“ sa željom da skrenu pažnju javnosti i medija na problem koji im otežava normalan život već godinama.

„Nedopustivo je da se pred turističkim gradom, kao što je Višegrad, u 21. vijeku prešutno dozvoljava rad, prije svega nelegalne deponije, čije postojanje ugrožava živote i zdravlje, ne samo nas mještana, već i čitavog Višegrada. Oblaci dima i otrovnih isparenja tokom čestog spaljivanja odlaze i u pravcu centra grada, stoga ovo nije samo naš, lokalni, problem, već problem i svih stanovnika Višegrada.“ – jednoglasni su članovi grupe.





## Studenti „nagovorili“ Vladu Brčko distrikta da ažurira registar

Istraživanje neformalne grupe studenata „Akreditovane visokoškolske ustanove – priznate diplome u Brčko distriktu“ i insistiranje kod Vlade BD da im dostavi zvanične podatke o visokoškolskim ustanovama u Distriktu, natjerali su Odjeljenje za obrazovanje da ažurira listu i upiše čak tri, koje do sada nisu bile u javno dostupnom registru.

„Prema dosadašnjim zvaničnim podacima, u registru Odjela za obrazovanje Vlade Brčko distrikta BiH upisane su visokoškolske ustanove: Visoka škola računarstva i poslovnih komunikacija EMPIRICA, Evropski Univerzitet Brčko distrikt BiH, Internacionalni Univerzitet Brčko distrikt BiH, Dislocirano odjeljenje Univerziteta u Sarajevu i Odsjek Odnosi s javnošću na Filozofskom fakultetu Sveučilišta u Mostaru. Nakon traženja da nam Vlada dostavi precizne podatke o statusu svih Univerziteta, Visokih škola i isturenih odjeljenja koji imaju sjedište u drugim gradovima BiH, naknadno su upisani još i Ekonomski fakultet u sastavu Univerziteta Istočno Sarajevo, Odjeljenje Univerziteta za poslovni inženjering i menadžment Banja Luka u Brčko Distriktu BiH i Dislocirano odjeljenje Nezavisnog univerziteta Banja Luka“, kažu iz neformalne grupe „Akreditovane visokoškolske ustanove – priznate diplome u Brčko distriktu“.

U Državni registar akreditovanih ustanova u BiH do sada upisana je rješenjem od 5. jula 2021. godine Visoka škola računarstva i poslovnih komunikacija EMPIRICA, dok su 4. februara 2022. godine institucionalno akreditovane i takođe upisane u Državni registar Internacionalni univerzitet Brčko distrikt BiH i Evropski univerzitet u Brčko distriktu BiH. Dislociranim organizacionim jedinicama matičnih VŠU Odjeljenje za obrazovanje Brčko distrikta izdalo je Rješenja o ispunjavanju uslova za osnivanje i početak rada, kao i dozvolu za rad u Distriktu.



# Preporuke institucije Ombudsmena BiH nadležni u općini Tešanj trebaju ozbiljno shvatiti



Nezadovoljni provođenjem redukcije vode u svom gradu NGP Valter uputili su prijavu instituciji Ombudsmena BiH sa zahtjevom da institucija istraži cijeli proces redukcije. Ombudsmeni su uputili Zahtjev Općini Tešanj i JKP Rad Tešanj da daju svoj stav i izjašnjenje o prigovoru grupe građana okupljenih oko pokreta Valter. Općina i JKP Rad su dostavili svoja izjašnjenja u jednom dokumentu i pojasnili problem sa svoje tačke gledišta, rezime izjave da su suša i povećana potrošnja vode u ljetnom periodu glavni razlog redukcije. Dostavili su i tablicu uporednih podataka o potrošnji vode u 2020. i 2021. po mjesecima. Članovi pokreta nisu bili zadovoljni odgovorom te su uputili instituciji Ombudsmena BiH komentar na izjašnjavanje Općine i komunalnog.

Na žalbu Valtera institucija Ombudsmena BiH je uputila nadležnim, općini Tešanj i JP Rad Tešanj, preporuke u kojima stoji da se u što kraćem vremenu obezbijedi adekvatno snabdjevanje stanovništva Tešnja pitkom vodom kao i da se u što kraćem roku krene sa realizacijom zaključaka o vodosnabdjevanju donesenih na općinskom Vijeću Tešanj. Takođe, u preporukama je navedeno da se u toku od tri mjeseca dostavi informacija šta su nadležni poduzeli po preporukama.

JP Rad je početkom marta poslalo instituciji Ombudsmena BiH informaciju u kojoj se navodi da je Skupština JP Rad usvojila Plan trogodišnjeg poslovanja koji je dostavljen općinskom Vijeću na uvid i razmatranje na sljedećoj sjednici Vijeća. Valter nema informaciju da li je općinsko rukovodstvo poslalo informaciju šta su poduzeli u zadnjem periodu po pitanju preporuka.



## OPTUŽNICE PROTIV ŠLJUNKARA JOŠ U LADICAMA

Neformalna grupa građana „Za legalnu i kontrolisanu eksploataciju šljunka u slivu rijeke Bosne“ tražila je od nadležnih podatke o postupanjima po prijavama građana u protekloj godini kada je u pitanju nelegalna eksploatacija minerala iz korita rijeke Bosne i poljoprivrednog zemljišta uz priobalje.

Iz Okružnog javnog tužilaštva Doboju odgovorili su da su u periodu od 01.01.-31.12.2021. godine, formirana 4 predmeta u vezi nelegalne eksploatacije šljunka i pijeska, a na osnovu podnesenih prijava zbog krivičnog djela Protivzakonito zauzimanje i eksploatacija prirodnih bogatstava i dobara od opšteg značaja. Dobojsko Tužilaštvo je navelo i krivičnu u poznatom „Slučaju Osječani“ za brutalnu devastaciju zemljišta i svojevrsni ekocid, te da se vode postupci, precizirajući da su podignute i potvrđene tri optužnice i da se vodi istraga protiv više odgovornih lica u privrednim društvima.

Sumirano, OJT Doboje je istaklo da je u periodu od 2020 – 2021. godina podignuto ukupno 5 optužnica, zbog nelegalne eksploatacije šljunka i pijeska, a po dvije optužnice sudovi su donijeli jednu odbijajuću presudu i jednu oslobađajuću presudu, na koju je Tužilaštvo uložilo žalbu. Po ostalim optužnicama krivični postupak je u toku pred nadležnim sudovima.

Sa druge strane na upit građana, Policijska uprava Doboje dostavila je podatke da su u protekloj godini policijski službenici, postupajući po Zahtjevima i Naredbama Okružnog javnog tužilaštva Doboje kao i zaprimljenim prijavama u predmetima nezakonite eksploatacije šljunka i pijeska, podnijeli pet izvještaja o počinjenim krivičnim djelima, protiv šest lica za devet počinjenih krivičnih djela.

*„Pored navedenog, nadležnom Tužilaštvu je dostavljeno ukupno deset Izveštaja o preduzetim mjerama i radnjama. U toku je i rad na ukupno 21 predmetu u vezi nedozvoljene eksploatacije šljunka ili pijeska“, odgovor je iz PU Doboje.*





## AKTIVISTI U BORBI PROTIV NELEGALNIH ŠLJUNKARA UKAZALI DA DRINA IPAK (NI)JE KRIVA

Aktivisti za zaštitu i uređenje vodotoka rijeke Drine su u sedmici kada se obilježava Svjetski dan voda simbolično organizovali ulične akcije u Zvorniku i u Bijeljini kako bi ukazali javnosti na neophodnost zaštite vodotoka ove “krivudave” ljepotice te podsjetili nadležne da upravljanjem vodotoka rijeka i vršenjem nadzora nad eksploatacijom šljunka preventivno djelujemo i smanjujemo rizik od mogućih poplava.

Neformalna grupa građana “Stop nelegalnim šljunkarima na Drini” se posljednjih mjeseci usmjerila na analizu nalaza Izvještaja koji je Glavna služba za reviziju javnog sektora RS objavila 30.decembra 2021. Cilj Izvještaja je da se ispita na koji način nadležne institucije kreiraju i provode mjere i aktivnosti dislokacije i vađenja materijala iz vodotoka i, s tim u vezi, obezbjeđuju adekvatno uređenje i zaštitu vodotoka rijeke Drine.

*“Revizijom je utvrđeno da se u proteklom periodu dodjela lokacija za dislokaciju i vađenje materijala iz vodotoka rijeke Drine ne zasniva na planskim dokumentima, analizama stanja vodotoka, potrebama i prioritetima. Osim toga, revizorski izvještaj je pokazao da postojeći način praćenja i nadzora nad dislokacijom i vađenjem materijala iz vodotoka rijeke Drine, što je nadležnost JU “Voda Srpske”, ne obezbjeđuje ostvarenje primarnih ciljeva uređenja i zaštite vodotoka. Također, istaknuto je da nadležne institucije ne obezbjeđuju potrebnu zaštitu vodotoka i vodnog zemljišta od nedozvoljenih aktivnosti eksploatacije šljunka i pijeska iz vodnog zemljišta i vodotoka rijeke Drine, što će takođe biti segment našeg praćenja u narednom periodu”, izjavio je građanski aktivista, Dušan Aćimović.*





## UČEŠĆEM U AKCIJI MAGLAJLIJE UKAZALI NA ZNAČAJ RIJEKA I ŠUMA

I maglajski aktivisti za zaštitu rijeke Bosne od nelegalnog šljunčarenja su se u nedjelji kada se obilježavaju Svjetski dan voda i Međunarodni dan šuma pridružili akciji pošumljavanja na lokalitetu Oručje između Maglaja i Tešnja, ukazujući da je akcija pošumljavanja korisna i za aktivnosti kojima se oni bave u zaštiti korita rijeke Bosne, jer se pošumljavanjem preventivno djeluje i smanjuje rizik od mogućih poplava, kao što se zalaganjem za uređen vodotok kontrolisanom eksploatacijom šljunka smanjuju neregularnosti u ovoj oblasti i građani štite od poplava.

Napominju da je poznato da drveće doprinosi većoj akumulaciji i stvaranju rezervi vode i njenom sporijem oticanju, posebno kada se radi o obilnijim padavinama. U područjima koja su pod šumom su i manji rizici od bujičnih potoka i uopšte povećanja vodotoka rijeka, jer sva količina oborina ne padne na zemljište, jedan dio se zadrži na krošnjama drveća, grmlja i prizemne flore, odakle ispari.

*„Učestvujemo i odazivamo se na sve korisne akcije za društvo, dio naših mlađih aktivista učestvovala na akciji koju je organizovalo Ministarstvo za poljoprivredu, šumarstvo i vodoprivredu ZDK i Kantonalna uprava za šumarstvo povodom Međunarodnog dana šuma. I prošle godine smo povodom Svjetskog dana voda učestvovali u ekološkoj akciji čišćenja obale korita rijeke Bosne i okoliša”- istakla je Zumra Gušo, predstavnica građanske grupe „Zaustavimo nelegalnu eksploataciju šljunka u Maglaju“.*







## Pod pritiskom aktivista Općinsko vijeće Kakanj odbilo dati izjašnjenje za provođenje koncesije za mHE “Bilješevo”

Nakon zaprimanja informacija da se na dnevnom redu OV Kakanj nalazi Prijedlog o davanju saglasnosti za provođenje dodjele koncesije za izgradnju mHE “Bilješevo” na rijeci Bosni, Aarhus centar u BiH, zajedno uz podršku drugih članica Koalicije za zaštitu rijeka u BiH, je hitno reagovao te pripremio Zahtjev za odbacivanje navedenog prijedloga, kao i pojedinačna obrazloženja vijećnicima OV Kakanj o štetnosti mHE. U Zahtjevu je pored niza argumenata protiv davanja saglasnosti posebno istaknuta činjenica da javnost, koje se predmet tiče, nije na adekvatan način uključena u proces odlučivanja o konkretnim aktivnostima, s obzirom da se o tome prvo trebale objavijestiti mjesne zajednice koje bi bile direktno pogođene izgradnjom mHE “Bilješevo.” Međutim, Prijedlog odluke je odmah bio upućen na odlučivanje OV Kakanj. Pod pritiskom aktivista u koordinaciji sa Aarhus centrom u BiH, te drugim NVO iz Koalicije za zaštitu rijeka BiH Općinsko vijeće Kakanj odbilo dati izjašnjenje za provođenje koncesije za mHE “Bilješevo.”



# Narodna skupština Republike Srpske usvojila novi Zakon o obnovljivim izvorima energije!

Na 20. redovnoj sjednici Narodne skupštine Republike Srpske koja je održana 10.2.2022. godine usvojen je novi Zakon o obnovljivim izvorima energije RS kojim se ukida davanje podsticaja za male hidroelektrane veće snage od 150 kW! Predstavnici Aarhus centara u BiH zajedno za drugim članicama Eko BiH mreže i Koalicije za zaštitu rijeka učestvovali su u javnim raspravama o Nacrtu zakona o obnovljivim izvorima energije, te su Ministarstvu energetike i rudarstva dostavili pisane primjedbe na Nacrt. Ujedno predstavnici Aarhus centra u BiH tokom prošle godine održali su sastanak sa potpredsjednikom Narodne skupštine Republike Srpske, Denisom Šulićem, s kojim su razgovarali o stavovima građana povodom izgradnje malih hidroelektrana i nužnosti usvajanja novog Zakona o obnovljivim izvorima energije RS.

## **Predata inicijativa za odbacivanje Prijedloga Odluke o davanju saglasnosti za provođenje koncesija za izgradnju mHE “Bilješevo” na rijeci Bosni i svih ostalih mHE u Kaknju!**

U cilju spriječavanja provođenja koncesije za izgradnju mHE “Bilješevo” na rijeci Bosni, aktivisti NVO “Alternativa” Kakanj i predsjednici mjesnih zajednica: (MZ) Bilješevo, MZ Modrinje, MZ Podgora i MZ Donji Kakanj su uspjeli prikupiti gotovo 2.000 potpisa građana Kaknja!

Krajem mjeseca januara, kao druga tačka dnevnog reda 14. redovne sjednice OV Kakanj našao se Prijedlog odluke o davanju saglasnosti za provođenje koncesije za izgradnju mHE “Bilješevo”, na rijeci Bosni, snage 4,00 MW. Navedeni prijedlog rezultat je samoinicijativnog zahtjeva za dodjelu koncesije koju je Ministarstvu za poljoprivredu, šumarstvo i vodoprivredu ZDK uputio investitor “TRGOŠPED” d.o.o. Kakanj. Nakon snažnog protivljenja mještana i predsjednika MZ općine Kakanj, Općinsko vijeće Kakanj je donijelo odluku o sprovođenju javne rasprave, a koja se zatim preimenovala u tvz. “internu” raspravu na kojoj su bili pozvani telefonskim putem samo predsjednici MZ općine Kakanj, te jedna nevladina organizacija iz Kaknja, ali ne i šira javnost.

Kako bi osigurali da se glas građana Kaknja čuje, mještani, članovi udruženja “Alternativa” Kakanj zajedno sa predsjednicima MZ Kakanj, uz pomoć Aarhus centra u BiH i Fondacije “Atelje za društvene promjene”- ACT, te mnogih drugih lokalnih aktivista, uz poruku i visibility kampanju “NE DAMO RIJEKU BOSU!” započeli su sa prikupljanjem potpisa građana. Početkom mjeseca marta 2022. Općini Kakanj je predato gotovo 2.000 potpisa koji su iskazali jasno “NE” u odnosu na izgradnju mHE “Bilješevo.”





## **Sistematično i beskompromisno protiv sistemske korupcije u javnom sektoru koja ugrožava pravo na rad i dostojanstvo osoba sa invaliditetom u Federaciji BiH**

Udruženje Sindikat uposlenika Fonda je u okviru projekta „Sistematično i beskompromisno protiv sistemske korupcije u javnom sektoru koja ugrožava pravo na rad i dostojanstvo osoba sa invaliditetom u Federaciji BiH“ održalo sastanake sa osoba sa invaliditetom na kojima su pokušali animirati osobe sa invaliditetom i njihove organizacije u borbi protiv korupcije u oblasti profesionalne rehabilitacije i zapošljavanja osoba sa invaliditetom.

Pored navedenog, ukazali su na nezakoniti izbor direktora Fonda za profesionalnu rehabilitaciju i zapošljavanje osoba sa invaliditetom. Navedeno je, između ostalog, rezultiralo ponovnim poništenjem konkursa za izbor direktora navedene javne ustanove. Doprinijeli su i povećanju izdvajanja novčanih sredstava za novo zapošljavanje osoba sa invaliditetom od strane Fonda za profesionalnu rehabilitaciju i zapošljavanje osoba sa invaliditetom. Širi uticaj naših aktivnosti se ogleda u tome što će se osigurati pozitivan ambijent za zapošljavanje osoba sa invaliditetom a time će se osigurati pravo na dostojanstven život i rad ove kategorije stanovništva.



# Borba protiv korupcije u porodilištima

Udruženje BABY STEPS se u okviru projekta »Borba protiv korupcije u porodilištima« fokusiralo na ostvarivanju saradnje i podrške institucija relevantnih za rješavanja problema korupcije u porodilištima, na različitim nivoima. Najznačajniji korak jeste dogovorena saradnja sa oba porodilišta koja su bila od interesa za projekat. Opća bolnica »Prim. Dr. Abdullah Nakaš« (Sarajevo) i Univerzitetski klinički centar RS (Banja Luka) su izrazili interes i spremnost za saradnju na ovom projektu. Početkom godine, u Banja Luci je održan sastanak sa načelnicom Klinike za ginekologiju i akušerstvo Univerzitetskog kliničkog centra u Banja Luci, a potom i press konferencija, na kojoj je najavljena saradnja sa UKC Republike Srpske. Tom prilikom je pomoćnik direktora UKC-a, dr. Slobodan Hajder, istakao da su vrata UKC-a otvorena za svaki vid saradnje i da se stanje najprije treba popraviti upravo u porodilištima, jer su majke koje rađaju posebno važna kategorija, u jako važnom trenutku života borave tu, i njihov život kao i život njihove djece svima mora biti na prvom mjestu.

Pored toga, potpisan je i Memorandum o saradnji sa Agencijom za sertifikaciju, akreditaciju i unapređenje kvaliteta zdravstvene zaštite RS.

U februaru je u Sarajevo održan i okrugli sto na kojem su prisustvovali predstavnici porodilišta Opća bolnica »Prim. Dr. Abdullah Nakaš«, te predstavnici Agencijom za sertifikaciju, akreditaciju i unapređenje kvaliteta zdravstvene zaštite RS i Agencije za kvalitet i akreditaciju u zdravstvu FBiH. Osim prezentacije rezultata projekta, te otvorene diskusije o izazovima i prijedlozima daljih aktivnosti, predstavljeno je i tehničko rješenje za anonimnu elektronsku prijavu korupcije u porodilištu. Ovo web-bazirano rješenje omogućava porodiljama da izvrše prijavu koruptivnih radnji po otpustu iz porodilišta, pri čemu će pristupne podatke platformi dobiti zajedno sa otpusnim pismom. Cilj sistema za prijavu korupcije jeste menadžmentu porodilišta omogućiti direktnu povratnu informaciju od strane njihovih korisnika.

Navedeno rješenje je dostavljeno i putem pošte porodilištima Opće bolnice »Prim. Dr. Abdullah Nakaš« (Sarajevo) i Univerzitetskog kliničkog centra RS (Banja Luka), sa posebno izrađenim uputstvom o načinu uvođenja i korištenja, te šiframa za pristup za porodilje.



# Aplikacija za anonimnu prijavu ilegalnih aktivnosti u šumarstvu



Inicijativa za šumarstvo i okoliš – FEA (eng. Forestry and Environmental Action) koja provodi kampanju Aplikacija za anonimnu prijavu ilegalnih aktivnosti u šumarstvu je do 31. marta registrovala da je aplikacija na Google Play Store preuzeta ukupno 202 puta, dok je na Apple Store preuzeta ukupno 104 puta.

U periodu od januara do marta 2022. godine ukupno je 6 zaprimljenih prijava za područje Kantona Sarajevo, dok je za područje Zeničko-dobojskog kantona registrovano 7 prijava putem aplikacije.

Organizacija fea je kontinuirano tokom izvještajnog perioda promovisala dostupnost aplikacije „Čuvajmo šume“ i putem društvenih mreža, online portala, TV gostovanja i sastanaka sa interesnim grupama.

Povodom Međunarodnog dana šuma, tim organizacije fea je sproveo kampanju javnog podizanja svijesti o borbi protiv korupcije u sektoru šumarstva, na način da je na prometnom dijelu grada Zenice dijelio promo materijal i pozivao građane Zenice da preuzmu aplikaciju „Čuvajmo šume“. Također, ista aktivnost je realizovana i na području grada Sarajeva.



# Od zauzimanje skupštine, preko peticije do revolucije u ministarstvu

Građanski pokret »Buđenje« u okviru kampanje »Karton revolucija« je detektovalo da problemi korupcije u visokom obrazovanju na Tuzlanskom kantonu već duži niz godina nisu u fokusu donosioca odluka u najmnogoljudnijem kantonu u Bosni i Hercegovini. Kako građanski aktivizam može biti snažan faktor za poticanje promjena najbolje dokazuje slučaj Karton revolucije u Tuzli. Naime aktivisti ovog pokreta su početkom februara simbolično održali press konferenciju u Plavoj sali BKC-a Tuzla, mjestu na kojem se održavaju sjednice Skupštine Tuzlanskog kantona sa koje su simboličnim „zauzimanjem“ poslali snažnu poruku o važnosti delegiranja problema korupcije i nepotizma u fokus javnosti. Nakon što su mobilisali javnost i ukazali na problem ubrzo je organizovana peticija podrške u kojoj su izneseni konkretni zahtjevi za borbu protiv korupcije u visokom obrazovanju a koju su građani masovno podržali. Aktivisti su u samo dva sata prikupili preko 600 potpisa podrške. Navedene aktivnosti su praćene kvalitetnim i sadržajnim pritiskom na društvenim mrežama i elektronskim medijima što je rezultiralo nesvakidašnjim pozitivnim rezultatom koji se ogledao u činjenici da se krajem mjeseca marta u Ministarstvu obrazovanja i nauke Tuzlanskog kantona realizovao sastanak između predstavnika Karton revolucije, resornog ministarstva i Agencije za razvoj visokog obrazovanja i osiguravanje kvalitete Bosne i Hercegovine na kojem se razgovaralo o navedenim problemima. Ovo je ujedno bila i rijetka prilika da predstavnici institucija između sebe razmjene mišljenja, iskustva, pozitivne prakse kao i utvrde daljnje korake. Navedenim aktivnostima kreirani su kvalitetni temelji za nastavak borbe koja će rezultirati jasnim rezultatima.

---

## Zajedno za promjene

---

OC Vermont u okviru projekta »Zajedno za promjene« je kao jedan od rezultata uspio da kroz sastanke sa poljoprivrednicima okupi poljoprivrednike iz svih oblasti (voćari, pčelari, stočari i ratari) te uspostavi saradnju koja do sada nije postojala.

Drugi rezultat kampanje je da će se uspostaviti baza podataka svih poljoprivrednika sa područja Brčko distrikta koja će sadržati informacije (mehanizacije, ljudstva, obradivih površina i stoke). Razlog ovome je ograničavanje dobijanja više podsticaja na jedno gazdinstvo, to jest jedno gazdinstvo jednako jedan podsticaj.

Tokom čitave 2021. godine, radili su monitoring usvojenog pravilnika (pilot verzija pravilnika), te su sve uočene nedostatke sublimirali i poslalo donosiocima na razmatranje o usvajanju.





## Transparentno finansiranje NVO iz budžeta Brčko distrikta

OC Vermont je u okviru projekta “Transparentno finansiranje NVO iz budžeta Brčko distrikta” doprinio da krajem decembra, Vlada Brčko distrikta BiH donese odluku o podjeli donacija civilnom sektoru. Pravovremenim reagovanjem Omladinskog centra „Vermont” prema medijima i vlastima su uspjeli zaustaviti proces dodjele donacija.

U februaru mjesecu je izašao Javni poziv od strane Odjeljenja za stručne i administrativne poslove Vlade Brčko distrikta BiH te se sredstva dijele na transparentniji način. Također, donesena je odluka da će se po prvi put vršiti javno otvaranje pristiglih projekata, što se do sada nikada nije desilo.



## Korupcija nije problem pojedinca!!!

Grupa ste građana koja se suočava sa korupcijom u vašoj zajednici i zbog toga ne možete da ostvarite pravo koje pripada vama ili širem krugu ljudi?

Trpите posljedice loših odluka donesenih usljed zloupotrebe položaja ovlaštenih lica ili nezakonitog postupanja vlasti?

Kontaktirajte nas u cilju dobijanja podrške vašim inicijativama u borbi protiv korupcije

# 063 396 536

[protivkorupcije@ccibh.org](mailto:protivkorupcije@ccibh.org)



# POSLODAVCI PRIJAVITE KORUPCIJU!



Poslovanje bez korupcije!

Poslodavci, u interesu stvaranja što boljeg  
poslovnog ambijenta, prijavite korupciju putem naše  
web-stranice: [www.poslovanjebezkorupcije.ba](http://www.poslovanjebezkorupcije.ba)

Podržano od



Ovaj materijal je omogućen uz podršku američkog naroda putem Američke agencije za međunarodni razvoj (USAID).  
Sadržaj ovog dokumenta je isključivo odgovornost Udruženja poslodavaca FBiH i ne mora nužno odražavati  
stavove USAID-a ili Vlade Sjedinjenih Američkih Država.



## POSLOVANJE BEZ KORUPCIJE

Udruženje poslodavaca Federacije BiH je u okviru kampanje “Poslovanje bez korupcije” organizovalo konferenciju povodom finalizacije kampanje. Na konferenciji je zaključeno da su ključni koraci ka smanjenju korupcije, koja pravi štetu ne samo privredi, nego i građanima, ohrabrivanje poslodavaca na prijavljivanje koruptivnih radnji od strane javnog sektora te intenzivnija saradnja i koordinacija svih relevantnih na identificiranju najčešćih oblika korupcije u poslovanju, predlaganju rješenja i značajnije lobiranje na izmjeni i donošenju zakona koji će onemogućiti poduzimanje koruptivnih radnji.

Tokom konferencije, kojoj su prisustvovali predstavnici Transparency International-a BiH, Agencije za prevenciju korupcije i koordinaciju borbe protiv korupcije, Federalne uprave za inspeksijske poslove, Unije udruženja poslodavaca RS i članice Udruženja poslodavaca FBiH, kao ključni problem je istaknuto neprijavlivanje korupcije od strane privrednika, posebno u slučajevima inspeksijskih nadzora, zbog straha od odmazde te nepovjerenja da će ih sistem adekvatno zaštititi i sankcionirati počinitelje.

“Najčešći slučajevi korupcije dešavaju su tokom inspeksijskih nadzora i jedan od razloga je neujednačenost zakona na svim nivoima. Konkretno primjer su novčane kazne za prekršaj neizdavanja fiskalnog računa, koje su u pet zakona predviđene u različitim rasponima. To ostavlja mogućnost inspektorima da na osnovu lične procjene odrede koju će novčanu kaznu propisati, što onda dovodi do toga da se od subjekata nadzora traže određeni pokloni ili nagrade”, istaknuo je Mladen Pandurević, direktor Udruženja poslodavaca FBiH.

Tokom diskusije naglašeno je da veliki problem predstavljaju i disciplinske sankcije protiv državnih službenika, koji vrlo rijetko gube posao zbog nezakonitih radnji što je, također, zakonskim propisima neophodno promijeniti. Posebno je istaknuto da je korupcija dvostrani odnos te je na privrednicima obaveza da u svojim kompanijama kroz edukacije, obuke i provođenje antikoruptivnih standarda rade na eliminiranju svih oblika korupcije.



# Virus za koji ima lijek!

Udruženje građana Stop mobbing i partnersko udruženje Kap, provode projekat prevencije korupcije u zdravstvu, pod nazivom "Virus za koji ima lijek!", u sklopu kojeg su postignuti sljedeći značajniji rezultati u proteklom periodu. Provedeno je istraživanje "Put medicinske i sanitetske opreme i vakcina u BiH u toku pandemije", prvo ovakve vrste koje je realizovano u periodu 2020-2021. godine. Preko 50 % institucija u FBiH i 90 % u RS-u nije iskazalo želju za saradnjom i dijeljenjem informacija od javnog značaja. Nakon prikupljenih informacija iz 21 javne zdravstvene institucije na svim nivoima, sačinjen je dokument na 78 strana koji je predstavljen na press konferenciji u Mostaru 7. aprila na Svjetski dan zdravlja. U istraživanju su uočene brojne nelogičnosti poput kupovine, nabavke i vrijednosti donacija maski, vakcina, testova, kiseonika i drugih medicinskih sredstava, o čemu će dva udruženja obavijestiti nadležne inspeksijske službe.

Zatim je pokrenuta inicijativa za donošenje novog Zakona o pravima, obavezama i odgovornostima pacijenata u NSRS. Narodni zastupnik u NSRS Ljubiša Krunic je 9. februara 2022. na sjednici NSRS podržao inicijativu UG Stop mobbing i Kap za donošenje novog Zakona o pravima, obavezama i odgovornostima pacijenata. Inicijativa je pokrenuta na osnovu peticije 3.075 građana i pacijenata iz RS koji traže donošenje zakona koji će definisati njihova prava u zdravstvenim ustanovama. Ministar zdravlja i socijalne zaštite RS Alen Šeranic pozvao je predstavnike dva udruženja na sastanak u ministarstvo zdravlja RS kako bi mu predstavili prijedloge koji se odnose na eventualno donošenje Zakona o pravima pacijenata u RS.

## Nabavke testova za Covid 19 tokom pandemije

Iz podataka prikupljenih tokom istraživanja, testovi u FBiH su kupovani ili donirani po cijenama od **1,43 KM** za PCR do **90 KM**.

Cijena PCR-testa u Republici Srpskoj iznosila je od **0,44** dolara (oko 0,78 KM), a Institut za javno zdravstvo RS ih je plaćao **30** do **80 KM**.

ZZO KS je dvije stavke "transportni medij" 2.000 i 6.000 komada, kupio preko UNDP-a po različitim cijenama istom Odlukom od 19.03.2021. i to **1,85 KM** i **3,5 KM** po komadu.

Podaci iz istraživanja "Put medicinske i sanitetske opreme i lijekova tokom Covid-19 pandemije"

PODRŽANO OD



## Nabavke vakcina tokom pandemije

Vakcine različitih proizvođača u BiH su kupovane i donirane po različitim cijenama.

**Pfizer:** od **19,01 KM** do **30,32 KM** po dozi

**AstraZeneca:** Od **1,96 KM** do **7,31 KM** po dozi.

Srbija je donirala BiH **10.000** vakcina AstraZeneca vrijednosti **3,91 KM po vakcini**. Za iste vakcine je prilikom kupovine iz federalnog budžeta izdvojeno **7,128 KM** po dozi!

Podaci iz istraživanja "Put medicinske i sanitetske opreme i lijekova tokom Covid-19 pandemije"

PODRŽANO OD





# STOP nezakonitom zapošljavanju

UG Demos je u sklopu svoje kampanje „STOP nezakonitom zapošljavanju“ organizovao uličnu akciju 25.02.2022.godine na Trgu mladih, tokom koje je sa građanima, u neposrednoj komunikaciji, detaljno objašnjen problem angažovanja lica po ugovorima van radnog odnosa, kao i diskriminacija kojoj su izloženi u odnosu na svoje kolege, angažovane na određeno ili neodređeno.

„Na osnovu revizorskih izvještaja došli smo do podatka, evo uzećemo samo za prošlu godinu – u pitanju je čak 406 uposlenih, angažovanih lica u Brčko distriktu, s tim što daleko prednjači Odjeljenje za obrazovanje koje ima čak 190. To je enorman broj ljudi koji rade poslove koji nisu u skladu sa zakonima. Niti u skladu sa Zakonom o državnoj službi, niti Zakonom o radu“, kaže Božidar Jović, predsjednik Udruženja građana “Demos” i koordinator projekta “STOP nezakonitom zapošljavanju”.

Osim toga, 15.03.2022. održan je i sastanak sa supervizorom za Brčko, gospodinom Majklom Skenlanom, na kojem su dobili punu podršku u težnjama za kreiranje bolje budućnosti za sve građane, budućnosti bez korupcije, sa posebnim akcentom na zapošljavanje u javnom sektoru. Superzivora je UG Demos informisao o podacima iz revizorskih izvještaja, a koji sadrže zaprepaštajuće podatke o broju lica angažovanih o ugovorima van radnog odnosa.

Takođe, 26.03.2022.godine u kino sali Omladinskog centra organizovana je i javna tribina na kojoj je predstavljen problem koji je u fokusu projekta „STOP nezakonitom zapošljavanju“, a tiče se velikog broja lica angažovanih po ugovorima van radnog odnosa, kao i diskriminacije koju trpe.

“Broj nezakonito angažovanih radnika po ugovorima van radnog odnosa u 2020. je preko 600, što je poraz pravne države. Svi ovi ljudi rade u „sivoj zoni“ jer obavljaju poslove za koje je predviđen ugovor o radu, a oni su angažovani po ugovoru van radnog odnosa i ne ostvaruju osnovna radnička prava kao što su zdravstveno osiguranje, osiguranje u slučaju nesreće na radu, uplata u fond PIO/MIO, radni staž, godišnji odmor i drugo. Vidjećemo kakav će biti novi Zakon o državnoj službi Brčko distrikta BiH koji je u fazi izrade i iskreno se nadam da će spriječiti malverzacije u procesu zapošljavanja, kao i da će biti socijalno odgovoran. Uputićemo inicijativu da prilikom popunjavanja radnih pozicija u slučaju bolovanja ili drugih izostanaka sa posla do 90 dana, Biro za nezaposlene automatski kontaktira jednu po jednu osobu sa rang liste koja bi uključivala sljedeće posebne kriterijume: broj godina na birou za nezaposlene, dužina radnog staža i socijalni status porodice. Takođe, lica sa invaliditetom bi trebala biti zaposlena u javnom sektoru u omjeru da na 25 zaposlenih bude zaposleno jedno lice sa ivaliditetom. Ovo sve mora biti sadržano u Zakonu o državnoj službi, a ne u podzakonskim aktima koje je lako izmijeniti“, ističe Božidar Jović-koordinator projekta.



# REZULTATI MONITORINGA TUŽILAŠKIH ODLUKA

U sklopu Antikorupcijske kampanje i podizanja svijesti javnosti o radu Tužilaštva u Republici Srpskoj udruženje građana "Put Pravde" Banja Luka sprovelo je monitoring tužilačkih odluka u periodu od januara 2018. do 2022. godine.

Po odgovoru Ureda disciplinskog tužioca utvrđeno je da je primljeno 76 pritužbi po službenoj dužnosti. Ured disciplinskog tužioca je donio odluku po 66 pritužbi dok je 10 pritužbi još uvijek u radu. Najveći broj disciplinskih prekršaja se odnosi na disciplinske prekršaje nemara ili nepažnje u vršenju službene dužnosti tužioca ili bilo kakvog drugog ponovljenog nepoštovanja dužnosti tužioca. Po ovom pitanju od 66 pritužbi UDT je odbacio 59 pritužbi. UDT je utvrdio da je osnovano 7 pritužbi i pokrenuto je 5 disciplinskih postupaka od čega je 3 okončano, i to je jedan okončan odbijanjem disciplinske tužbe dok su dva u toku. UDT do sada nije izrekao niti jednu disciplinsku mjeru. UDT je izrekao samo jednu javnu opomenu. Dva tužioca su razriješena dužnosti, u toku su tri disciplinska postupka protiv troje tužilaca u kojima UDT u trenutku odgovara na zahtjev ne zna konačan ishod. Napominjemo da zakonom nije propisana mogućnost žalbe na odluke UDT o odbačaju pritužbi i UDT ne može razmotriti kasnije zaprimjene podneske koji sadrže nove navode o povredi dužnosti nosilaca pravosudnih funkcija.

Na osnovu prikupljenih podataka o procesuiranju krivičnih djela korupcije u Bosni i Hercegovini može se zaključiti da procesuiranje nije na nivou koje zahtijeva trenutno stanje i rasprostranjenost korupcije u društvu, što potvrđuju mnogobrojna istraživanja koja su objavljena o stanju korupcije u Bosni i Hercegovini, kao i zvanični izvještaji međunarodnih organizacija zaduženih za praćenje stanja u pravosuđu u Bosni i Hercegovini i našem istraživanju.

Provedeni monitoring je potvrdilo ranije rađena istraživanja. Okružno javno tužilaštvo Banja Luka je primjer tužilaca koji su potpuno nevidljivi. S obzirom da je ovo prva instanca koja se pokazala potpuno neefikasnom cijeli dalji proces adekvatnog procesuiranja je narušen i upitno je adekvatno završavanje krivičnih procesa.

Tokom 2020. godine zabilježen je zabrinjavajući pad broja podignutih optužnica za korupcijska krivična djela u iznosu od 44% u odnosu na 2019. godinu, odnosno sa 225 podignutih optužnica za korupcijska krivična djela tokom 2019. godine na tek 126 podignutih optužnica za korupcijska krivična djela tokom 2020. godine.

Po informacijama koje smo dobili iz UDT koji predstavlja jedinu instancu sankcionisanja neadekvatnog rada tužilaštva vidimo da je od ukupno 76 primljenih pritužbi procesuirano samo 7 te izrečena jedna disciplinska mjera. Ovakvo stanje ukazuje na to da je trenutno važećim zakonodavnim sistemom tužilac u potpuno nedodirljivoj poziciji koji ima slobodu da ne radi po zakonu da je u službi kriminala a da pri tome ne može biti sankcionisan i sistemski je zaštićen od strane institucija koje bi i same trebale da procesuiraju tužioce koji su u službi kriminala.

Zaustavite  
zloupotrebu  
ovlaštenja radi  
privatne koristi!!!



Ukoliko ste  
primjetili korupciju  
u potrošačkim  
prigovorima od  
strane inspekcijskih  
organa prijavite  
Udruženju "DON"

# KORUPCIJA

ZLOUPOTREBA OVLAŠTENJA  
RADI PRIVATNE KORISTI

Korupcija može uključivati više  
ili neku od ovih aktivnosti:

## VRSTE KORUPCIJE:

1.

### Politička

među državnim  
službenicima i  
političarima koji  
imaju političku moć

2.

### Administrativna ili birokratska

među službenicima javne uprave  
zaduženim za provedbu odluka i propisa,  
te službenika koji rade s građanima

## Javni interes potrošača u borbi protiv korupcije u radu inspekcijskih službi – Monitoring potrošačkih prigovora

Udruženje „DON“ iz Prijedora je u sklopu kampanje „Javni interes potrošača u borbi protiv korupcije u radu inspekcijskih službi – Monitoring potrošačkih prigovora“ 13.04.2022. godine organizovao sastanak radne grupe za izradu mehanizma za unapređenje inspekcijskih nadzora prilikom rješavanja potrošačkih prigovora u Banja Luci u prostorijama Republičkog inspektorata. Sastanku su prisustvovali predstavnici Inspektorata Republike Srpske, Ekspert i predstavnici „DON-a“. Predstavnik Inspektorata, glavni republički tržišni inspektor, Radivoje Gavrić, izrazio je snažnu podršku za unapređenje postojećih inspekcijskih nadzora, a sve u svrhu smanjenja mogućnosti za koruptivne radnje i poboljšanja rada republičkih tržišnih inspektora. Prijedlog „Smjernica za postupanje republičke uprave za inspekcijske poslove po predstavkama i zahtjevima za zaštitu prava potrošača“ je prosljeđen svim inspektorima na dostavljanje eventualnih sugestija, prijedloga i mišljenja.

Radivoje Gavrić se zalaže za transparentnost rada Inspektorata i dostavio je udruženju „DON“ obrasce po kojima trenutno funkcioniše Inspektorat vezano za evidentiranje i rješavanje potrošačkih prigovora. Na sastanku je zaključeno da se nastavlja kroz radnu grupu, rad na izradi konačne verzije Smjernica za unapređenje rada inspekcijskih službi i pokretanje inicijative prema Vladi Republike Srpske za usvajanjem navedenog dokumenta. Takođe se nastavlja i rad na drugim Smjernicama za praćenje samog procesa inspekcijskog nadzora i izvještavanje sa istog. U narednom periodu zajednički će se organizovati sastanci u pet regija sa republičkim ali i opštinskim/gradskim inspekcijskim službama.





**»SKANDAL: FEDERALNIM REVIZORIMA ONEMOGUĆENO DA PROVEDU REVIZIJU NAFTNIH TERMINALA FEDERACIJE. DIREKTOR NTF-A POZVAO ADVOKATA I HRVATSKU POLICIJU DA GA „ZAŠTITE“. NAŠA VLADA ĆUTI.«**

Prije nešto više od dvije godine, u sličnoj situaciji, kada su Uredu za reviziju tražene podatke odbili dati Pretis, Operator za obnovljive izvore energije i efikasnu kogeneraciju FBiH i FIA, prvo od strane Komisije, a potom i Parlamenta, takvo ponašanje okarakterisano je kao rušenje pravnog sistema i poretka, nepoštivanje pravnog sistema i poretka, nepoštivanje procedura i zakonskih propisa, te privatizacija institucija i preduzeća koji su u vlasništvu Federacije BiH. A Vladi bilo naređeno da preduzme adekvatne sankcije prema svima koji krše Zakon o reviziji institucija u FBiH.

Nastavak možete pročitati na:  
[www.antikorupcija.info](http://www.antikorupcija.info)



**»KO ĆE ZAUSTAVITI NELEGALNU I PO ŽIVOTE GRAĐANA OPASNU GRADNJU U OPĆINI STARI GRAD U SARAJEVU? (+VIDEO)«**

“Pozivamo nadležne lokalne institucije da spriječe nelegalnu gradnju u opštini Stari Grad, koja bi ugrozila živote i imovinu građana, te da zaustave praksu narušavanja Historijskog urbanog krajolika Sarajeva pogodovanjem privatnim interesima. Tražimo od svih nadležnih da konačno zaštite interese građana. Mi nastavljamo našu pravnu borbu i iskoristit ćemo sve pravne lijekove u ostvarenju svog cilja - nećemo stati dok se ne zabrani gradnja na ovom lokalitetu i dok se zahvat ne izbriše iz regulacionog plana.”, istakli su na danas održanoj press konferenciji aktivisti neformalne grupe građana “Zgrada”, čije, ovim povodom izdato saopštenje za javnost prenosimo u cjelosti.

Nastavak možete pročitati na:  
[www.antikorupcija.info](http://www.antikorupcija.info)

**»ŠEST VISOKOŠKOLSKIH USTANOVA IZ RS JOŠ BEZ DRŽAVNE AKREDITACIJE«**

U Državni registar akreditovanih visokoškolskih ustanova u BiH iz RS sa nespornim akreditacijama je ukupno deset visokoškolskih ustanova, dok su u 2022.godinu dvije ušle sa dopunskim rješenjima, jer na vrijeme nije okončan postupak njihove reakreditacije, ali se i one smatraju akreditovane.

Nastavak možete pročitati na:  
[www.antikorupcija.info](http://www.antikorupcija.info)



# PRATI TENDERE, PRATI SVOJ NOVAC!

Monitoring mreža organizacija civilnog društva, volontera i istraživača kontinuirano prati javne nabavke. U periodu januar-mart 2022. prikupljeni su i na portalu PratiMotendere objavljeni podaci o 2648 postupaka javnih nabavki, ukupne vrijednosti preko 38 miliona KM bez PDV. Monitoring podaci ukazuju na negativne korupivne trendove u sistemu javnih nabavki: kod 68% praćenih postupaka je identifikovan visok, a kod 26% srednji stepen rizika. PratiMo tendere omogućava praćenje javnih nabavki, otkrivanje rizičnih nabavki sa elementima korupcije i diskriminacije, praćenje statističkih trendova u sistemu javnih nabavki. Baza sadrži podatke o preko 400 javnih institucija, ustanova i preduzeća, odnosno preko 15.000 postupaka javnih nabavki vrijednosti preko 250 miliona KM.

Prateći javne nabavke pratimo tokove javnog novca. Portal PratiMo tendere je razvijen zbog građanki i građana Bosne i Hercegovine. Jednostavnom registracijom na portal svaki dan u svoj email inbox možete dobiti dnevni pregled realizovanih tendera, a od sada i mjesečni pregled informacija i tekstova ko, gdje, kako i na šta troši novac putem javnih nabavki.

## Prati tendere, prati svoj novac!

PRATIMOTENDERE.BA



# PRATIMO TENDERE

Informiši se!



# Antikoruptivne aktivnosti Transparency International BiH

## Sukob interesa

Na osnovu podataka dobijenih iz Registra nosilaca javnih funkcija Transparency International u BiH (TI BiH) je podnio prijavu Centralnoj izbornoj komisiji protiv Aladina Ćerimovića koji je po četiri osnova bio u sukobu interesa obavljajući četiri različite funkcije. CIK BiH je Ćerimoviću oduzeo mandat vijećnika u SO Velika Kladuša. Takođe, TI BiH je uputio prijavu Komisiji za odlučivanje o sukobu interesa RS protiv Gordana Mišeljića koji takođe obavlja četiri funkcije i po tri osnova se nalazi u sukobu interesa.

TI BiH je podnio prijavu protiv člana Predsjedništva Milorada Dodika, jer firme u vlasništvu njegove porodice posluju sa državom i primaju značajne podsticaje iz budžeta. Zakon o sukobu interesa u institucijama BiH propisuje da angažman bliskih srodnika izabranih zvaničnika u preduzećima koja posluju sa državom, dovodi do situacije u kojoj se ti zvaničnici nalaze u sukobu interesa. Firme „Fruit Eco“, „Agro voće“ i „Global Liberty“ koje su u vlasništvu porodice Dodik dobile su u 2021. godini oko 370.000 KM za saniranje štete od mraza, podršku za prodano i proizvedeno voće, regresirano dizel gorivo, protivgradne mreže i sl. Takođe, „Ugostiteljstvo Agape“ u vlasništvu Dodikove kćerke dobijalo je u proteklom periodu poslove od Ugostiteljskog servisa Vlade Republike Srpske u iznosima koji prelaze zakonski dozvoljeni prag od 5.000 KM godišnje. Zbog svega TI BiH je pozvao Komisiju za odlučivanje o sukobu interesa Bosne i Hercegovine čiji rad je zbog političkih opstrukcija u proteklom mandatu često bio blokiran, da provede postupak i ispita postojanje sukoba interesa jednog od najviših zvaničnika BiH.

## Javne nabavke

U proteklom periodu TI BiH je Agenciji za javne nabavke BiH podnio zahtjev za monitoring postupka nabavke obrazaca vozačkih dozvola koji je sprovela Agencija za identifikaciona dokumenta, evidenciju i razmjenu podataka BiH. IDDEEA je upitnim, pregovaračkim postupkom, ponovo dodijelila ugovor za nabavku obrazaca vozačkih dozvola kompaniji „Milbauer“, sa kojom je prije deset godina na isti netransparentan način sklopila osnovni ugovor. Sprovođenje pregovaračkog postupka samo sa ovom kompanijom za posao vrijedan 800.000 KM bez PDV-a u IDDEEA-i pravdaju „hitnošću“.

Dana 18.02.2022. godine Agencija za javne nabavke BiH objavila je Informaciju o lošoj praksi neobjavljivanja planova nabavki, a na osnovu prethodno podnesenih zahtjeva za monitoring od strane TI BiH.

## ALAC

TI BiH je u proteklom periodu predstavio godišnji izvještaj o radu Centra za pružanje besplatne pravne pomoći građanima u borbi protiv korupcije. Centar je primio je 1629 poziva građana koji su prijavili korupciju i tražili pravnu pomoć, a TIBIH je postupio u 265 predmeta pred nadležnim institucijama.

Uz pravnu pomoć TI BiH novinari portala Capital.ba uspjeli su doći do informacija o advokatima koje je RUGIP RS angažovala po službenoj dužnosti. Zbog pritisaka TI BiH i novinara portala Capital.ba RUGIP je najavio promjene vezane za angažovanje advokata.



# JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI **BORBE PROTIV KORUPCIJE**



## KONTINUIRANI JAVNI POZIV ZA PROJEKTE VOĐENJA GRAĐANSKIH INICIJATIVA I KAMPANJA U OBLASTI BORBE PROTIV KORUPCIJE

Poziv OCD (udruženjima građana i fondacijama) iz BiH da podnesu prijedloge projekata usmjerenih na borbu protiv korupcije, s fokusom na rješavanje konkretnih problema identifikovanih na lokalnom nivou ili zagovaračkih inicijativa usmjerenih ka višim nivoima vlasti.

Od aplikanata se traži da dostave ispunjenu aplikacionu formu, te ostale aplikacijom zahtijevane dokumente i to isključivo putem on-line platforme za apliciranje dostupne na linku:

<http://tender.protivkorupcije.ba/>







Podržano:



**USAID**  
OD AMERIČKOG NARODA

Ova publikacija omogućena je uz podršku američkog naroda putem Američke agencije za međunarodni razvoj (USAID).

Sadržaj ove publikacije je isključiva odgovornost Centara civilnih inicijativa (CCI) i ne mora nužno odražavati stavove USAID-a ili Vlade Sjedinjenih Američkih Država.